

四庫全書

子部

欽定四庫全書

子部

古今事文類聚新集卷八

九

詳校官中書

臣孫衡

侍讀

臣孫球覆勘

總校官編修

臣

王燕緒

校對官中書

臣

王家賓

謄錄監生

臣

李敦源

欽定四庫全書

古今事文類聚新集卷八

元 富大用 撰

省屬部

左右丞

歷代沿革漢成帝建始四年置尚書員五人有四丞光
武始減其二惟置左右丞掌錄文書期會左丞主吏
民章服及騶伯史右丞假署印綬及紙筆墨諸財用

庫藏至晉不改晉左丞主臺內禁令宗廟祠祀朝儀
禮制選用署吏給假右丞掌臺內庫藏及諸器用民
戶租布刑獄軍器督錄遠近文書章表奏事宋齊梁
隋皆有是官唐龍朔元年改左右丞曰左右肅機咸
亨元年復舊名五代梁開平二年改左右丞為左右
司侍郎避廟諱也至後唐同光元年復舊宋元祐令
尚書左右丞並正二品為執政官元以為宰相之貳
佐治省事

羣書要語尚書左丞彈八座以下居機密之會斯乃皇

朝之司直天臺之管轄

傅咸答李光序

古今事實

左君右君

漢制丞郎見二丞呼曰左君右君

宋百官志

左綱右轄

白居易為授庾承宣尚書左丞制云吾前命崔從持左綱今乃命承宣操右轄無俾戴劉魏杜專美於貞觀中

號曰神人

張謏少脩志節性聰明有令才鄉曲號曰神人除尚書

侍郎左丞進對威儀辭言辨遠帝深奇之

後漢書

方於管轄

唐劉洎上疏曰尚書萬機是為政本是以八座比於文

昌二丞方於管轄

八座畏憚

晉荀晞為左丞廉察諸曹八座已下皆側目憚之

三臺肅清

晉劉暕為尚書左丞正色在朝三臺肅清

臺閣自肅

晉傅咸為右丞臺閣大小望風自肅

諸公贊

郎吏脩整

韋弘景素以鯁亮稱及拜左丞居綱轄之地郎吏望風脩整

職稱朕望



唐戴胄拜尚書右丞尋遷左丞太宗謂胄曰尚書省天下綱維百司所稟若一事有失天下必有受其弊者今無令僕保之於卿當稱朕所望也胄性聰明處斷明速議者以為左右丞稱職武德以來一人而已

功滿詔留

黃香拜左丞功滿當還詔書留秩拜尚書遷僕射

東觀漢記

豪貴拂席

王維以詩名盛於開元天寶間諸王駙馬豪貴之家無

不拂席迎之乾元中為尚書右丞

有司供帳

張說代源乾曜為左丞視事之日上勅所司供帳設音樂內出酒食御製詩一篇以敘其事

記令史名

劉覽除尚書左丞令史七百人一見並記姓名當官清正無所私

對三騶飲

南史尚書二丞給三騶謝幾卿性不拘朝會嘗預宴遊苑不得醉而歸因詣道邊酒壚停車褰帷與車前三騶對飲觀者如堵幾卿處之自若

上殿不下

吳賀琛遷尚書左丞并參禮儀事琛前後凡郊廟諸議多所創定每見高祖與語常移晷刻省中為之語曰上殿不下有賀雅琛容止都雅故時人以此呼之

至門不開

北齊張耀為尚書左丞文宣近出令耀居守文宣夜還耀不開門勒兵嚴備火至看面然後開迎文宣笑曰君欲學郅君章也賜以錦袍以其忠勤遂見親待

不置僕射

唐貞觀中宇文節為尚書右丞明習法令以幹局見稱江夏王道宗嘗以私事託於節節遂奏之太宗大悅賜帛二百疋勞之曰朕不置左右僕射者正以卿在省耳

怒對宰相

顏真卿為尚書左丞代宗車駕自陝府還真卿請先謁五陵孔廟而後還宮宰相元載謂真卿曰公所見雖美其如不合時宜何真卿怒而前曰用舍在相公言者何罪然朝廷事豈堪相公再破除耶載深銜之

奏求良田

隋楊汪為兵部侍郎數年文帝謂諫議大夫王達曰卿為我覓一好左丞達遂私於汪曰我當薦君為左丞若事果當與良田為報汪以達言奏之達竟獲罪尋拜汪

尚書汪明習法令果於割斷時號稱職

劾競銀窟

隋郎茂為尚書左丞時工部尚書宇文愷右翊衛大將軍于仲文競河東銀窟茂奏劾愷位望已隆祿賜優厚拔葵去織寂爾無聞求利下交曾無愧色仲文大將軍近臣趨侍階庭朝夕聞道虞芮之風抑而不慕分銖之利知而必爭何以貽範庶僚示人軌物愷與仲文竟坐得罪

美錦令製

崔思謙初拜右丞奏曰陛下為官擇人非其人則闕今
不惜美錦令臣製之此陛下知臣之深亦微臣盡命之
秋

挽弩自射

晉郤詵為尚書左丞糾吏部尚書崔洪洪曰我舉郤丞
而還奏我此為挽弩自射詵聞曰昔趙宣子任韓厥為
司馬厥以軍法戮宣子之僕宣子謂諸大夫可賀我矣

崔侯為國舉才我以才見舉惟才是視各明至公何故
斯言洪聞悅服

歷園按火

趙洵為監察御史時禁中失火火發處與東宮相近代
宗疑之洵為巡使俾令即訊洵因歷壩園按據迹狀乃
上直中官遺火所致也既奏代宗稱賞德宗時在東宮
常感洵究理詳明及刺衢州年考既深與觀察使韓滉
不相得滉奏免洵官德宗見名謂宰相曰豈非永泰初

御史趙洵乎對曰然即日拜尚書左丞

當食批案

唐楊昉為左丞時宇文化及子孫理資蔭朝廷以事隔兩朝且親族衆多為言左司未詳其案狀訴者以道理已成無復凝滯勃然通昉昉曰適朝退未食食畢當詳案訴者曰公云未食亦知天下有累年羈旅者乎昉命案立批之曰父殺隋主子訴隋資生者猶配遠方死者無宜更敘時人深賞之

短偃曲鉤

唐崔善為武德中歷尚書左丞甚得時譽諸曹惡其聽察因其身短而偃嘲之曰崔子曲如鉤隨例得封侯髀上全無項胷前別有頭高祖聞勞勉之因購流言者加其罪

懦被擲器

晉王國寶因酒坐怒右丞相台之攘袂呼喚以盤盞樂器擲台之為有司所彈烈宗詔曰國寶縱肆情性其不

可長台之懦弱非監司體其免官

古今文集

雜著

王右丞制

元厚之

朕循唐制復文昌府以令僕執國大政而丞為之貳禮
優秩峻茲謂輔臣某亮直清明有猷有守服在禁近厥
聞惟休茲用命爾以中大夫正秩于右轄於戲庶習雖
逸法艱為初凡厥有官弗祗弗迪亦惟朕政未發于中

其能允諧時汝之任往服朕命厥惟懋哉

蒲左丞制

元厚之

同右丞某官問學才猷該洽通敏自朕識拔揚于禁嚴
是用命爾以中大夫正秩于左綱於戲若昔大猷訓迪
在位時朕忱汝協濟茲惟祗辟可以肅列曹惟若德可
以熙庶績圖休于永冀尚懋哉

劉摯尚書右丞誥

蘇子由

漢御史大夫能任其職則為丞相近世中執法議論不

撓亦補執政昔我仁宗優養正士開受直言時則有若
包拯張昇之流咸以敢言獲聞大政舊俗已遠此風寂
寥容悅相承亦棄不用朕追懷先正選建忠賢諤諤之
聲庶幾前烈具官劉摯早以御史少事裕陵力陳是非
不避權寵十年流落志氣不衰召置臺端首開正論進
任中司之要屢開白簡之言風聲凜然國是以定朕欲
試其行事之實是用付以右轄之權治忽所關寄任尤
重夫以言責人甚易以義持已實難爾其勉之毋使輔

政之功不若言事之效

謝除尚書右丞表

蘇子由

渙汗之恩已行而不反偃偻之志雖勤而莫伸上愧鴻
私下慙公議恭惟皇帝陛下接堯舜之統蹈成康之仁
體貌先正耆老之臣揀拔後來翹秀之士俯仰六載前
後幾人坦然公明故不私賢否之實穆然淵默故坐照
情偽之真臨御久則鑒愈明得失分則下無隱如臣者
西南賤士章句小儒早歲猖狂偶竊方聞之選中年流

落既安縣尹之卑遭時乏人致位近侍跌宕文墨之圃
囁嚅議論之場舉皆空言安有實效顧惟省轄之重實
參國論之餘豈無遺賢遽及微品地寒資淺何以望三
事之餘光才短力罷安能越六聯之滯論雖復黽勉就
職愧歎何言此蓋伏遇皇帝陛下天地之仁曲成草木
之陋父母之愛不錄子弟之非將建大廈以覆羣生故
收衆材而無棄物然臣負過其力受非所容惟有潔已
無私或不孤於托付引類自助幸得免於顛躋不渝始

終少答恩造

為樊左丞讓官表

臣某言伏奉今月二十八日制除臣尚書左丞寵命俯臨慙顏自失泛大鯨之海但覺魂搖戴巨鼇之山未知恩重臣聞尚書百揆翊亮萬機故天上尊北斗中樞陛下有南宮左轄晉昇孔坦諒直當時漢拜楊喬閑練故事庶得百僚有憚於會府諸侯取法於京師臣實謏才謬登清貫握蘭起草昔忝朝經剖竹頒條近貽人瘼備

歷中外無聞聲庸版圖再緝貢賦未均於九州銅印更
操威儀不檢於三署次郎補缺豈易其人聖主求才宜
難此受竊謂旁求俊乂側訪瓌奇必使德合準繩言成
網紀興化致理時無間言况安上必在於薦賢危身莫
踰於曠職儻蒙垂收紫渙俯矜丹誠愚臣保陳力之言
聖鑒有責成之地無任覲冒惶悚之極謹詣朝堂奉表
陳讓以聞臣所讓人別狀封進

律詩

上韋左丞二十韻

杜甫

鳳歷軒轅紀龍飛四十春
八荒開壽域一氣轉洪鈞
霖雨思賢佐丹青憶老臣
應圖求駿馬驚代得麒麟
沙汰江河濁調和鼎鼐新
韋賢初相漢范叔已歸秦
盛業今如此傳經固絕倫
豫樟深出地滄海闊無津
北斗司喉舌東方領縉紳
持衡留藻鑑聽履上星辰
獨步才超古餘波德照鄰
聰明過管輅尺牘倒陳遵
豈是池中物由來席上珍
廟堂知至理風俗盡還淳
才傑俱登用愚蒙

但隱淪長卿多病久子夏索居貧回首驅流俗生涯似
衆人巫咸不可問鄒魯莫容身感激時將晚蒼茫興有
神為公歌此曲涕淚在衣巾

贈韋左丞丈濟

杜甫

左轄頻虛位今年得舊儒相門韋氏在經術漢臣須時
議歸前列天倫恨莫俱鵠原荒宿草鳳沼接亨衢有客
雖安命衰容豈壯夫家人憂几杖甲子混泥塗不謂矜
餘力還來謁大巫歲寒仍顧遇日暮且踟躕老驥思千

里饑鷹待一呼君能微感激亦足慰榛蕪

參知政事

歷代沿革後魏古弼為尚書令參知政事隋蘇威高穎
等參預朝政唐劉洎張文瓘皆參知政事魏徵杜淹
等參預朝政崔仁師等參知機務此其始也宋乾德
二年太祖已相趙普畏其專將擇官以為副而難其
名稱召陶穀問曰下丞相一等有何官對曰唐有參
知機務參知政事今可用之遂命薛居正呂餘慶為

參知政事仍令不押班不知印不升政事堂止令就宣徽使廳上視事殿庭別設塼位於宰相後勅尾書銜降宰相數字月俸雖給半之盖帝意未欲令居正

等名與普齊也

會要史臣錢若水等曰按唐高宗嘗欲用郭時舉參知政事復以其資

淺止令同承受平章事亞於參政矣穀言失之

開寶六年詔參政薛居正等

於都堂與宰相同議公事又詔中書門下押班知印宜令與居正等同知雍熙四年御史言文德殿常朝百官皆有塼位惟參知政事未有詔令依位排砌至

道元年詔參政與宰相分日知印押正衙其埽位先
異宜合為一並得升都堂二年詔自今參知政事不
知印押班埽位列宰相後不升政事堂然押勅齊衙
行並馬至今不易參政行丞相事多不踰年淳熙初
葉夢錫龔實之行丞相近三年言者以為懷私嘉泰
許深甫為參政命陳勉之兼權又除袁起巖蓋三員
也嘉定初命雷季仲婁彥發樓大防亦三員遂為故
事元尚書省置參知政事二人為宰相之貳佐治省

事

羣書要語參聞政本職重端副

唐李靖制

宜緝台階之政

唐崔

日用制

變贊化原參知鼎實

柳子厚代謝表

擢參相府貳秩台衡

楊億謝表

須陪議於宰除

賜曾公亮批

豫大政於萬機下丞相之

一等

實錄

贊貳國鈞參圖廟論

歐陽集

黃樞貳職侍講金華

紫府引真參謀玉鉉

陳希烈制

參聞政道陪貳宰司

賜曾公亮批

詩句疾風知勁草板蕩識誠臣

古今事實

崔湜文詞

唐崔湜初執政也年二十七容止端雅文詞清麗嘗暮
出端門下天津馬上自吟曰春還上林苑花滿洛陽城
張燕公時為工部侍郎望之杳然而歎曰此句可效位
可得其年不可及也

翰林
盛事

戴胄忠直

唐戴胄為尚書參預朝政太宗嘗謂羣臣戴胄於我無
骨肉之親其實忠直厲行情深體國

諭除銀鈎

隋蘇威與高頴參掌朝政威見宮中以銀為幔鈎因盛陳節儉之美以諭上上為改容雕飾舊物悉命除毀

解賜佩刀

唐魏徵知門下省事詔朝章國典參議得失他日宴羣臣帝曰納忠諫正朕違為國家長利徵而已雖古名臣亦何以加親解佩刀以賜

本傳

貢金不受

褚遂良進黃門侍郎參綜朝政莫離支貢金遂良曰討

弑君之罪不受其賂

分紀

進爵以酬

唐戴胄為吏部尚書參預朝政太宗嘗謂羣臣戴胄於
我無骨肉之親但其忠直厲行情深體國事有機要無
不以聞所進官爵以酬厥勞爾

本傳

蹈履仁義

魏徵與杜淹等以秘書監參預朝政上問徵與諸葛亮

孰賢

云云

帝曰徵蹈履仁義以弼朕躬致之堯舜雖亮無

以抗

本傳

勸行仁義

魏徵字元成貞觀三年以秘書監參預朝政於是帝即位四年天下大治蠻夷君長襲衣冠帶刀宿衛東薄海南踰嶺戶闔不閉行旅不齎糧取給於道帝謂羣臣曰此徵勸我行仁義既效矣

本傳

參掌機密

魏文帝即位劉放孫資轉為左右丞參掌機密評曰劉放文翰孫資勤謹並管喉舌權聞當時

三國志

輔贊聖德

施大資點字聖與自除簽書未一月即參大政總軍國之務者凡六載所建明為多尤以輸忠切諫輔贊聖德

為心

言行錄

守道耿介

唐蕭瑀復參預朝政帝曰武德季太上皇有廢立議瑀

於爾時不以利誘威怵社稷之臣也因賜詩曰疾風知勁草版蕩識誠臣又曰公守道耿介古無以過然善惡大明或有時而失瑀頓首謝曰既蒙教又許以忠亮雖死日猶生年也

本傳

風範端凝

李沆嘗侍曲宴太宗目送之曰李沆風範端凝真貴人也俄除參知政事

職源

剛毅守節

薛簡肅公奎字宿藝拜參知政事公入謝上曰先帝嘗
言卿可用吾今用卿矣公感激自勵而素剛毅守節不
苟合既與政尤挺立無所牽隨

言行錄

剛正立朝

魯肅簡公立朝剛正嫉惡少容在政府七年務裁抑儆

倖不以名器私人

同上

稱為五貴

隋蘇威字文述裴矩裴蘊虞世基參掌朝政時人稱為

五貴

蘇臧傳

不直一錢

李昉素與盧多遜善待之不疑多遜知政事譖昉於上前人有言於昉曰盧與我厚不當爾後盧敗昉知政事及盧事昉頗為揮解之上因言曰盧多遜常毀卿不直一錢昉乃信上由此益重昉常目之為善人

真宰相才

寇萊公準召為參知政事嘗奏事切直太宗怒起輒攀

帝衣復坐事決乃退太宗曰此真宰相材也

太宗實錄

真台輔器

趙公普為相呂端為參政嘗語人曰吾觀呂公奏事得嘉賞未嘗喜遇抑挫未嘗懼亦不形於色真台輔之器也

中書總目

歐陽文忠公脩字永叔公在政府凡兵民官吏財利之要中書所當知者集為總目遇事不復求之有司公與

韓公同心輔政每議事心所未可必力爭韓公亦開懷不疑故嘉祐之政世多以為得人

言行錄

天章條事

范文正公仲淹字希文為參知政事每進見上以太平責之既而再賜手詔趣使條天下事又開天章閣召見賜坐授以紙筆使疏於前公退而條列所宜先者十數事上之

言行錄

又宋元憲公庠帝召二府天章閣觀書上

出詔目問天下利病事公時參知政事獨進曰臣等願

至中書條上既退草數千言奏之後皆施用

同上

兼權密院

趙忠簡公鼎字元鎮宰執奏事上詔孟庾沈與求並兼權樞密趙鼎曰仁宗陝西用兵宰臣兼樞密今臣既兼而參與亦令兼權則事歸一體無前所謂密院調兵而三省不知三省財竭而密院用兵不止者矣

言行錄

同議邊事

紹興四年六月臣僚言仁宗皇帝康定初陝西用兵知

樞密院晏殊言近詔邊事宰臣參議而參知政事獨不與聞乞自今並許同議仍令書檢帝曰議政之臣所當同國休戚詔皆從之望檢會康定故事應密院邊事之大者詔參知政事同議仍書檢詔依見行條例仍自今

三省官通書檢

中興會要

面議政事

趙清獻公抃字閱道參知政事感激思奮面議政事有不盡者輒密啟聞上手詔嘉之公與富弼曾公亮唐介

同心輔政率以公議為主

言行錄

前陳利害

王文忠公堯臣字伯庸在政事堂議論有所不同必反復切劘至於是而後止不為獨見在上前所陳利害甚

多
言行錄

前辯是非

唐質肅公介拜參知政事與同列論政事未嘗阿屈雖在帝前必究功辯析要是非之歸帝以是益敬信之而

天下翕然想望其風采一日語諸子曰吾備位政府知無不言桃李固未嘗為汝等栽培而荆棘則甚多矣

論禁朋黨

慶曆四年上與執政論及朋黨事參政范仲淹對曰自古以來邪正在朝未嘗不各為黨不可禁也在聖鑒辨之耳誠使君子相朋為善其於國家何害

涑水
記聞

令薦人材

趙忠簡公鼎在洪二年召還除參知政事上令鼎薦人

材公即以朱震范同呂祉陳橐呂本中林季仲薰茶上

之

言行錄

面折賈琰

竇偁與賈琰同事太宗府中太宗嘗與諸王府射琰稱贊而多矯誕偁叱之太宗不樂因罷會白太祖出偁陞州後為參知政事太宗謂曰卿何以至此曰陛下以藩邸舊恩至此太宗曰非也卿嘗面折賈琰賞卿之直耳

職源

頭毆劉樹

後魏古弼太武時為尚書令參知政事方欲奏除減苑
囿遇太武與劉樹圍碁弼猝樹頭毆其背太武奇弼公
直皆可其奏以與百姓

通鑑

取法韓歐

周益國文忠公必大除參知政事上曰近見卿遇事殊
不依違執政之於宰相事任非遠自當和而不同公曰
韓琦歐陽脩殿上日有所爭退則懽然無間最為可法

言行錄

勞曰裴度

慶歷中貝州兵士王則反明鎬師久無功參知政事文
彥博請行上欣然委之凱旋除平章事及見上勞之曰
卿朕之裴度也

職源

太平宰輔

王文正參預朝政一日便殿論邊事退文正歎曰何日
邊候徹警使吾輩得為太平宰輔李文靖公不答至中

書召文正語之曰惟聖人能內外無患自非聖人外寧
必有內憂譬人有疾常在目前則知憂而治之

言行錄

清優學士

孫夢得為參知政事曰俸祿差厚爾與學士亦不甚相
遠但清優不如學士而勞責過之

東齋記事

自節度除

丁謂自保信軍節度使知江寧召為參知政事以當降
麻盛文肅為學士以為參知政事合用舍人草制遂以

制除丁甚銜之

倦遊錄

與相職均

張方平除參政制曰參議大政雖下丞相一等至於坐斷廟堂之論上則幹元化以調四時下則苞至仁以澤萬類近則羣元仰首以承德遠則殊俗交臂以待命蓋與宰相之職業均焉

一員押麻

凡鎖院文臣職事官承務郎釐務官通直郎以上明日

赴交德殿聽麻宰相樞密皆不往惟輪參政一員押麻
麻卷自內出閣門啟御封兩吏對展宣贊舍人南面搢
笏叉手摘首尾詞及階官以授參政參政付中書吏百
官不拜而退若大詔令及冊后之類則宰相文武百僚
俱入

輪日知印

至道元年詔自今參知政事宜與宰相輪日知印押正
衙其位壩先異位宜合為一商議軍國政事並得升都

堂閏七月銜改會

要

乘傳赴闕

淳化四年知大名府趙昌言乘傳赴闕拜給事中參知政事即日赴中書視事

轉官加階

王冀公以參知政事判大名府召還加邑封契丹方講好真宗欲重其事冀公入謝特命以衣帶鞍馬賜之自後二府轉官加階勲封邑入謝皆有所賜

敵喜得人

薛簡肅公奎拜參知政事公嘗使契丹議論服其坐中及聞公用皆喜曰是得人矣

行且相卿

契丹謀入寇畢文簡公士安首疏五事帝多納用中書闕相乃進公參知政事帝曰未也行且相卿

魚頭公

魯肅簡公參大政樞密使曹利用恃權驕橫公屢折之

帝前時貴戚用事者莫不憚之目為魚頭參政因其性直言骨鯁如魚頭也

骰子選

丁謂作參政或率楊文公賀之公曰骰子選耳何足道哉

魏徵批鱗

魏徵參預朝政帝曰人言徵舉動疏慢我見其嫵媚耳對曰陛下導臣使言臣敢不數批逆鱗哉

丁謂拂鬚

丁謂參知政事嘗會食於中書有羹污中書冠準鬚謂與拂之準曰君為參預大臣而與官長拂鬚耶謂顧左右深愧恨之

召母賜坐

賈黃中兩受詔知貢舉多棟拔寒俊號為無私又掌吏部選事品藻精當上益知其才拜給事中參知政事召見其母王氏賜坐與語曰教子如此真所謂今之孟母

也因賦詩以美之賜予甚厚

加父優恩

參知政事父見其進拜者盧朱崖吳正肅與尚書張公安道樞副陳堯叟張文孝旻文肅田登用而朝廷多優

加其父恩命焉

春明退
朝錄

不交一談

張洎為給事中參知政事與寇準同列先準知吏部選事洎掌考功為吏部官屬準年少新進氣銳思欲老儒

金史卷八十八
附以自大泊夙夜坐曹每冠帶候準於省門揖而退不
交一談準益重之後既同秉大政準亦忌之泊奏事準
愈謹政事一決於準無所參預

不曉一句

張洎為參知政事嘗越次奏曰呂端等備位廊廟上有
所詢問乃默然不言深失訐謨之體端曰洎雖有所言
皆不過摩揣陛下意耳上默然明日洎上疏徵賈捐之
棄珠崖事願棄靈武以省闕隴餉餽上初有意既而悔

之覽奏不悅却以付洎謂曰卿所謂朕不曉一句洎皇
恐流汗而退

同議都堂

會要開寶六年六月詔參政薛居正呂餘慶於都堂與
宰相趙普同議公事

坐退思巖

魯宗道為執政營一小室畫山水朝退獨坐謂之退思
巖雖妻子亦不許入

古今文集

雜著

蔡參政制

元厚之

勅卿輔之任為朕股肱惟高謀博識可以濟太平之功
惟同德一心可以成天下之務居嘗遴選尤謂才難具
官某學足以造微智足以適變向繇禁近遂長憲臺繩
愆糾繆而多所贊襄糾佞彈邪而無所迴隱維持大法
以尊君愛國為心排沮異端以陳紀立經為務詢求列

位爾實忠嘉斷自朕心進參大政夫惟以公滅私則無
朋淫之毀以忠事上則有輔德之休祇服訓詞往欽朕
命

章參政制

元厚之

勅朕若稽古正名於百工惟門下二品副侍中之職與
聞國論實左右予具官某稟資雋明通達治體當陪宰
府出殿師藩今茲命爾躋秩于東省爾其念哉民之利
病在賦政政之臧否在官人官非其人政或失當出納

自爾往惟欽哉

讓知政事表

李嶠

有命自天光寵踰量如集于木啟處失圖

中謝

臣聞簡賢

任能百揆所以時敘謬官失職九流於是咸曠隆替所
寄義不可輕臣才實凡庸志無遠大叨預簪纓遂升臺
閣踐金門而遊石室掌狐史而參鳳綸被蜉蝣之衣徒
竊榮寵接駕鷺之羽久慙尸曠甘受妨賢之責忽承非
次之恩乃使參預機衡獻替帷幄將濟巨之舟楫味和

羹之醢醢以挈瓶之智陪負鼎之遊將何以祇奉帝惟
弼亮皇極况丹青所運鼓舞通於四時鑪錘所裁綱紀
行於萬俗動闕政體豈易其人臣才缺行疎藝殫術淺
同子房之多病異吳漢之強力策支離之杖未振其軀
資擁腫之材豈勝其任將恐貽災傾餽取辱敗軍喪實
虧名夫豈足惜害公撓法茲焉是懼敢緣陳力之義輕
布由衷之請伏冀九霄垂澤三舍迴光體臣不移之愚
矜臣難奪之志特停過謬改命才賢則器滿之凶不累

於凡鄙棟隆之吉永光於聖代

辭免參知政事表

歐陽脩

職參論道宜極選於一時授匪其人實駭聞於衆聽恩

命所被跼蹐難安

謝中

伏念臣本乏材能徒緣幸會列於

侍從白首無聞置在樞機素殫已甚雖聖主之恩天地

曲示含容而朝廷之事毫釐動關利害豈止曠官之誚

每懷誤國之憂矧惟政事之臣實代天工之任俾之贊

貳宜擇材賢伏望皇帝陛下收誤獎之恩廣僉諧之訪

憫疲駑之已試備見無庸求俊乂以在廷擢之不次俾
或安於舊職冀免速於罪辜報效之誠殞靡後已

謝除參知政事表

歐陽脩

贊貳國鈞參聞妙論謂宜不次之選冀得非常之材乃
以敘遷比之承乏誤恩過被訴讓靡從

謝中

伏念臣少迫

賤貧偶勤學問儒者博而寡要况匪多聞文章世之空
言豈能適用徒以早邁亨嘉之會驟蒙獎擢之私叨言
語侍從之流逮今踰紀玷出納樞機之任初乏可稱幸

先彈理之未加每欲逡巡而忍去敢期睿眷俾與政機
優以寵章進其爵秩望非意及榮與憂并此蓋伏遇皇
帝陛下堯德聰明禹躬勤儉博求俊乂以濟治康謂臣
既樸且愚必能循於忠謹雖庸而懦尚可策其疲駑猥
以備員遂茲冒寵敢不益堅素守自勉不强惟殫犬馬
之勞上答乾坤之造

辭免參知政事劄子

樓鑰

承命下臨撫躬增惕竊以中書之本萬化固資參預之

良近弼之有二臣足稱倚毗之重敢言推擇誤及凡庸
伏念臣游黜從班叨塵宥府才再周於月琯已疊被於
恩綸玩愒自慙於事功而何補衰疲既甚況疾病之復
侵方將俟使介之旋便請掛衣冠而退忽驚寵渥俾與
政機載攷舊章間有三人之同列若稽近比未聞兩地
之贅員伏望皇帝陛下俯察由衷曲憐過分收還成渥
願亟賜於俞音茂東英才以共扶於興運

辭免參知政事表

樓鑰

進參政柄誠出誤恩冒貢遜函未回淵聽渚布懇祈之

切敢辭俯偃之恭

謝中

伏念臣才不逮中身今既老十載

排根之已甚實倍費於保全一朝收召而復還又屢叨

於褒擢非敢忘知止之義蓋欲堅圖報之心今則疾疢

交侵徒強顏而自覲年齡云邁顧納祿之未能使在旬

月之間稍有毫釐之補序遷而上已分已逾而况據案

牘而書名雖具員而何益對冕旒而奏事無長策之可

陳誤寵所加羣言必駭伏望皇帝陛下念經綸之事重

思輔贊之才難別選英髦俾作調元之助母容衰瘁更
詒濫吹之譏或畀舊班俯存孤迹

謝除參知政事表

樓鑰

充貳樞庭方慙玩愒晉陪宰路遽被推遷倍深臨谷之
危莫遂循牆之請

謝中

竊以朝廷建輔號天子之四鄰政

事參聞下丞相之一等定名稱於乾德復官制於建炎
必求異能乃副隆委伏念臣頽齡景迫壯志日凋再掌
吏銓但守停年之格濫居宥府未寬思職之憂雖粗竭

於謫才終莫裨於末議負二宜去有七弗堪宿恙漸侵
將籲天而致禱誤恩狎至真踏地以靡遑况秉鈞當軸
之虛員而知印押班之分日兼與漢章之約仍從商皓
之游命服匪頒復賜天閑之駿爰田增衍更開公社之
封昔在本兵尚為傲冒茲叨助理尤懼曠瘼茲蓋伏遇
皇帝陛下盛德又新至誠樂與折衝禦侮坐底於外寧
聚精會神力先於內治東求俊乂實在弼諧肆令衰退
之蹤亦忝延登之數臣敢不益殫愚慮仰贊宏規曰都

曰俞願竊慕賡歌之喜知足知止庶幾從告老之私

上曾參政書

臨溪

某聞古之君子立而相天下必因其材力之所宜形勢之所安而役使之故人得盡其材而樂出乎其時今也某材不足以任劇而又多病不敢自蔽而數以聞執事矣而閣下必欲使之察一道之吏而寄之以刑獄之事非所謂因其材力之所宜也某親老矣有上氣之疾日久比年加之風眩勢不可以去左右閣下必欲使之奔

走跋涉不常於親之側非所謂因其形勢之所安也伏
惟閣下由君子之道以相天下故某得布其私焉論者
或以為事君使之左則左使之右則右害有至於死而
不敢避勞有至於病而不敢辭者人臣之義也某竊以
為不然上之使人也既因其材力之所宜形勢之所安
則使之左而左使之右而右可也上之使人也不因其
材力之所宜形勢之所安上將無以報吾君下將無以
慰吾親然且左右惟所使則是無義無命而苟悅之為

可也害有至於死而不敢避者義無所避之也勞有至
於病而不敢辭者義無所辭之也今天下之吏其材可
以備一道之使而無不可為之勢其志又欲得此以有
為者蓋不可勝數則某之事非所謂不可辭之地而不
可避之時也論者又以為人臣之事其君與人子之事
其親其勢不可得而兼也其材不足以任事而勢不可
以去親之左右則致為臣而養可也某又竊以為不然
古之民也有常產矣然而事親者猶將輕其志重其祿

所以為養今也仕則有常祿而居則無常產而特將輕去其所以為養非所謂為人子事親之義也且某之材固不足以任使事矣然尚有可任者在吾君與吾相處之而已爾固不可以去親之左右矣然任豈有不便於養者乎在吾君與吾相處之而已爾然以某之賤未嘗得比於門牆之側而慨然以鄙樸之辭自通於閣下之前欲得其所求自常人觀之宜其終齟齬而無所合也自君子觀之由君子之道以相天下則宜不為遠近易

慮而不以親疎改施如天之無不燾而施之各以其命之所宜如地之無不載而生之各以其性之所有彼常人之心區區好忤而自私不恕已以及物者豈足以量之邪伏惟閣下垂聽而念焉使天下士無復思古之君子而樂出乎閣下之門而又使常人之觀閣下者不能量也豈非君子之所願而樂者乎冒黷威尊不任惶恐之至

與鄭參政劄

朱晦庵

山野伉拙處世不諧然自少日即蒙當世一二鉅公教誨期許待以國士居常厲志不敢少貶以辱其門亦庶幾得因濟會少有毫髮以自效於當世不意莫年此志不遂而又適遭時論大變威福下移忠賢奔波海內震駭病中聞之憤悶鬱結覓死無路亟欲草疏自通幾或開悟而子弟諸生交謁更諫以為如此適增國家之累而無益紛拏累日疾勢遂侵此乃窮命使然是亦無足言者今若得以因病辭官并脫無名之職則與世長辭

含笑入地無所恨矣伏惟參政矜憐有素切望乘此機會曲賜保全萬一更有纏撓不遂所懷則熹素心尚在本未能平一旦遇事感觸不能自己更以垂死之年自貽投竄之禍亦非參政之所欲也抑時事如此有識寒心而參政從容其間未肯身任其責此亦中外所深疑者而熹猶竊恐高明之有待而發也不知其果然耶其不然耶如其果然則安危之機相去日遠亦不可以少緩矣垂絕之言無復倫次惟此一念炳然如丹伏惟明

公念之

詩話

作釣魚詩

見前參
政類

古今事文類聚新集卷八

欽定四庫全書

古今事文類聚新集卷九

元 富大用 撰

省屬部

左右司

郎中
員外郎

歷代沿革隋煬帝三年尚書都司始置左右司郎各一人
人品同諸曹郎從五品掌都省之職唐武德初省貞
觀初復置改為郎中龍朔二年改為左右承務咸亨

中復舊名掌副左右丞所轄諸司事天后永昌元年
復增置左右司員外郎各一人神龍初省後復置宋
朝以為階官元豐正名始實有職掌左右司郎中各
一人員外郎各一人凡四員掌舉諸司之綱紀號為
都司亦曰左右曹元豐六年都司置御史房主行彈
劾御史按察失職七年御史房置簿以書御史六曹
官糾核之多寡當否為殿最紹聖初詔都司以歲終
點檢六曹稽違太多者其姓名取旨二年詔御史臺

察六曹稽緩違失者送左司紀定建炎三年以置檢
正省左右司二員明年復隆興元年詔左右司郎官
各差一員減罷二員二年詔左司書擬吏戶禮機速
房右司書擬兵刑工賞功房文字後以右司掌刑房
事任為劇乃置二員元左司掌總察吏戶禮三部受
事傳事右司掌總察兵刑工三部受事傳事各置郎
中員外郎都事其屬有祇候郎君架閣庫管勾同管
勾等人

羣書要語三公天子之股肱掾屬三公之喉舌

漢崔寔傳二

十四司呼左右司為都公

唐書

董正六曹

彌綸省闥

紀綱百司左右司掌受傳六曹之事而舉正文書之

稽失

四朝志

舉稽違署符自知宿直為丞之貳

六典

掌舉諸

司之綱紀與百僚之程式以正邦理以宣邦教

同上

位膺

列宿爵綰通班總八座之繁司承萬幾之要務鏘鏘會

府掌北斗之璣衡肅肅禮闈握南宮之樞輿

張鷟勅許鑑文

尚

書政本左右司綱紀之地故郎選異於諸曹

南豐擬制

都司

分治六官事無巨細畢陳於前若網在綱振之則舉弛

之則廢

樂城除
孫覺制

中臺都司主以郎吏非獨付受書奏亦

以助正紀綱

除張康
國等制

升冠都司之右

趙及
制

都司紀綱之

地非習知臺閣故事不在茲選

同上

參訂左曹

參訂右

曹

同上

古今事實

毗佐助鼎

太尉司徒司空長史秩比千石號為毗佐三台助鼎和

味應劭漢
官儀

台佐加貂

褚球字仲寶為司徒右長史加貂佐加貂始自球

南史

玄冕黻裳

隋煬帝始置左右司郎各一人宋因改曰郎中服章與
諸司郎中並同玄冕五旒衣元章裳刺黻一章兩梁冠
玄纓纁裳

天后永昌元年始置左右司員外郎各一人時顧琮自

侍御史陳元懷真以洛州司戶遷其朝服與諸司員外郎並爵弁玄纓簪導青衣纁裳一梁冠

以文辭薦

白敏中字用晦為左司員外郎武宗惟聞白居易名欲召用之是時居易病足宰相李德裕薦敏中文辭類其兄而有器識

以詳整稱

武元衡字伯蒼遷左司郎中詳整任職時以詳整稱重

勵志獨立

隋骨儀為右司郎中于時政漸濁亂貨賂公行士夫變

節而儀勵志守常介然獨立

隋書

草疏極言

張拭字敬夫除右司員外郎知閣門事張說除簽書拭
夜草手疏極言其不可且詣宰相質責之宰相慙憤不
堪而上獨不以為忤親札疏尾付宰相使諭旨拭復奏

上意感悟命得中寢

楊誠齋集

精簡得人

太宗朝劉洎上疏曰尚書萬機乃為政本比者綱維不舉竝為勲親在位品非其任功勢相傾將救茲弊且宜精簡四員左右丞左右司郎中如竝得人自然綱維一舉亦當矯正趨競豈惟息其稽滯哉

唐書

掄選有序

吳王潛為左司郎中典選事時喪亂之後官失其守甲簿湮沒潛雍容款接坐客常滿隨才而接人人自以為

得徐知誥相吳掄選有序潛之力也

九國志

公廳決事

劉摯傳摯遷右司郎中初宰掾每於執政分廳時請問
白事多持兩端伺意旨摯始請以公禮聚見共決可否

都堂坐白

張維字振綱留為左司郎中遇事有未便輒詣都堂坐
白或甚曰瑣瑣辨切非朝官體公曰都司助調鼎實幾
微所關若視吏籤擬輒涉筆書不置可否安用我輩耶

晦庵集

沮大臣議

倪濤字臣濟遷左司員外郎朝廷議有事燕雲大臣爭先決策為同位計濤獨曰天下久平士不習戰軍儲又屈無輕議以貽後患宰相王黼怒曰左司敢沮軍耶罷

之

東都事畧本傳

宣都司力

葉顥除右司時孝宗初即位欲清中書之務增宰士之

員公膺首選遷左司一日帝召諫官曰葉顥在都司二年甚宣力然與宰相為朋黨諫官對曰臣不識葉顥聞之公論不然因陳其求外補意帝默然良久曰非卿則朕無以知此人越翼日除吏部侍郎兼權給事中

楊誠齋集

書數曾布

陳瓘為右司員外郎以書獻曾布曰尊私史而壓宗廟緣邊費而壞先政皆閣下之過也布讀之大怒辨論移時瓘指事敘言辭色不撓堂吏比肩竦觀又以日錄辨

國用須知繳申三省遂出知泰州

丁未錄

面折頤浩

紹興三年時方審量濫賞以左右司領之呂頤浩當國時有縱舍右司員外郎王岡輒持不可曰公秉國鈞於天下具瞻之地不平謂何怨始有所歸矣頤浩矍然

中興

系年錄

出使除職

元豐六年七月左司郎中范雍直龍圖閣河北轉運使

都司出使除職自此始元祐元年范子奇范純夫自左右司出為河北京東轉運皆用雍例直龍圖閣長編

被劾失職

許鑑為左司郎中不稱職張鷟劾之云位膺列宿爵綰通班總八座之繁司承萬機之要務唐書

自書除目

王震字子發元豐四年開天章閣初用官制大除拜詔震與吳雍從輔臣執筆入記聖語面授右司員外郎直

使自書除目時論榮之

哲宗實錄本傳

學為宰相

紹興十三年三省擬進右司郎中上謂輔臣曰神宗聖訓云左右司便是學為宰相豈可不謹擇會要

都事

歷代沿革本尚書都令史之職令史蓋前漢官也漢尚書臺令史秩二百石魏令史皆八品晉尚書都令史八人秩二百石與左右丞總知都臺事宋齊八人梁

陳五人品竝第八隋開皇初改都令史為都事置八人正八品上唐置六人從七品上自晉宋齊後魏北齊隋置八者當八座之數梁陳置五者當五曹之數唐置六者當六曹之數宋尚書省都事正八品元於左右二司各置都事亦古制也

古今事實

絳服賢冠

都令史絳朝服進賢二梁冠官品第八廩月八斗

晉百官表

注

朱衣執板

自魏晉宋齊正令史書令史皆有品秩朱衣執板進賢

二梁冠

齊職儀

判事側坐

尚書郎判事正坐都令史側坐書令史過事

北齊故事

在任專學

虞溥字允元為偏將軍領兵備隴西在任專學以郎中

補尚書都令史

有國士風

趙孟字長舒補尚書都令史善於清談有國士之風其面有疵點諸事不決皆言當問疵面

言古葬地

太康六年尚書郎令史王銓上言古葬必於不食之地不妨民令率土之臣各附京邑求墓地廣種松栢臣恐數十年後民稀松栢相望非永安之制



欽定四庫全書



古今事文類聚新集

古今事文類聚新集卷九

欽定四庫全書

子部

古今事文類聚新集卷十

詳校官中書

臣孫衡

侍讀

臣孫球覆勘

總校官編修

臣

王燕緒

校對官中書

臣

王家賓

謄錄監生

臣

李敦源

欽定四庫全書

古今事文類聚新集卷十

元 富大用 撰

六曹部

總尚書

歷代沿革尚書古官也周為內史周禮司會中大夫二人戰國時有尚冠尚衣之屬秦世少府遣吏四人在殿中主發書謂之尚書漢初有尚冠尚衣尚食尚浴

尚席尚書謂之六尚武帝遊宴後庭始用宦者主中書以司馬遷為之遂罷其官以為中書之職成帝建始四年罷中書宦者又置尚書五人一人為僕射而四人分為四曹通掌圖書祕記章奏之事各有其任一曰常侍曹主丞相御史公卿事二曰二千石曹主刺史郡國事三曰民曹主吏民上書事四曰主客曹主外國夷狄事後又置三公曹主斷獄是為五曹後漢光武以三公曹主歲盡考課諸州郡事改常侍曹

為吏部曹主選舉祠祀事民曹主繕修工作監池園
苑事客曹主護駕羌胡朝賀事二千石曹主辭訟事
中都官曹主水火盜賊事合為六曹是時尚書雖有
曹名不以為號靈帝以侍中梁鵠為選部尚書於此
始見曹名魏改選部為吏部又有吏部左民客曹五
兵度支凡五曹晉置吏部三公客曹駕部屯田度支
為六曹而無五兵及渡江有吏部祠部五兵左民度
支五尚書宋齊梁各有六尚書又有起部尚書起部

不常興立宮廟則權置事畢省陳承梁置尚書五員
後魏分尚書三十六曹曹置代人令史譯令史書令
史各一人隋改為六部尚書分司曹務直宿禁省如
漢之制唐因隋制六典建官龍朔二年改尚書為太
常伯咸亨元年依舊宋初監藩鎮之弊以尚書郎曹
出領外寄熙寧詔新官制以六曹尚書侍郎為長貳
元祐置權尚書元因唐宋舊置六部各以尚書為之
長

羣書要語帝曰龍朕聖讒說殄行震驚朕師命汝作納

言夙夜出納朕命惟允尚書唯仲山甫王之喉舌詩士之

權貴不過尚書漢官解詁尚上也言最在上總領之也釋名尚

猶奉也百官言事當有案平處奏之故曰尚書同上尚書

萬事之本朕所責成也而廩秩儉薄甚非治體康帝起居注

漢明帝詔尚書蓋古之納言出納朕命機事不密則害

成可不謹歟漢官儀天下樞要在於尚書韋彪傳太宗謂戴

胄曰尚書總國綱維失一事天下有受其弊者戴胄傳漢

置五曹今分六尚近喻喉舌遠譬斗樞

隋江總表

出納王命

敷奏萬機蓋政令之所由宣選舉之所由定斯乃文昌

天府

隋百官志

文昌政本司會要經況其五曹斯納百揆

南史

八座之任非賢莫居

蔡謨疏

臣聞尚書百揆翊亮萬機故

天上尊北斗中樞陛下有南垣左轄

柳子厚遜官表

尚書職在

機衡宮禁嚴密

漢郎頭傳

入作納言光輝紫極

韋誕集

影組文

昌升簪清覽

傅儀傳

獻善宣美

楊雄歲

綜事分務發揮政源

魏志王肅云

詩句尚書北斗尊

顏真卿集

持衡留藻鑑聽履上星辰

杜甫北

斗司喉舌東方領縉紳

赤管隨王命

尚書踐台斗

並同上

尚書總庶事官人承法憲

魏應璩詩

解組便歸閒處士

折花莫笑病尚書

歐公

朝罷人人識鄭崇直聲如在履聲

中

東坡

上方行賜尚書舄路人不識呼尚書但見凜凜雄

千夫我如懷祖拙自謀正作尚書已過優

並同上王述字懷祖與義

之齊名而義之輕之

尚書氣與秋天香

杜

古今事實

猶天喉舌

李固疏曰陛下有尚書猶天之北斗北斗為天喉舌尚

書陛下之喉舌

李固傳

擢任喉舌

後漢左雄虞詡上疏薦之曰雄有王臣蹇蹇之節宜擢任喉舌之官必有弼正之益由是拜尚書

試對第一

後漢翟酺時尚書有闕詔將大夫以上試對政事第一

天文道術以第一者補之由是酺對第一拜尚書焉

本傳

早拜見重

蔡景歷拜度支尚書舊式拜官在日午後景歷拜日適逢駕幸玄武觀在位皆侍宴帝恐景歷不預特令早拜其見重如此

委以老成

晉山濤轉尚書表辭年老詔曰方今多事嘉謀良圖委以老成

金史四庫全書
卷十
帝喜得人

梁明少遊知名之士位都官尚書簡文帝謂人曰我不

喜明少遊作尚書喜朝廷得人

南史

典定舊制

伏湛字惠公拜尚書典定舊制

袁山松漢書

閑練舊典

李固薦楊淮閑練舊典且有幹用宜在機密特拜尚書

益都耆
舊傳

明習舊章

王博拜尚書明敏習漢家舊事

分紀

明習故事

侯霸光武時拜尚書時無典故朝廷又少近臣霸明習故事每春下寬大之書奉四時之令皆霸所建

典樞機

韋彪上疏曰欲急世所務當先除其患源任尚書典樞

機天下事一決之不可私也

華嶠後漢書

典機密

尚書唐虞官也龍作納言詩云仲山甫王之喉舌秦改稱尚書漢亦尊此官典機密也

漢官儀

即古六卿

魏世事統臺閣重內輕外故八座尚書即古六卿之任也衛盧久居斯位不忝厥職

魏志

制法九品

陳羣為尚書制九品為官人之法

同上

讜言正直

朱穆為尚書讜言正直

謝承後漢書

方毅廉貞

黃琬方毅廉貞為尚書

續漢書

魏朗謇諤

魏朗字少英入為尚書再升紫薇謇諤禁省不屈豪右

謝承後

漢書

荀緄寬敏

欽定四庫全書

古今事文類聚新集

卷十

荀緄字伯條拜尚書緄性明寬敏於衆職以厲羣僚秉
機平正直道而行是時内外公卿大夫莫不敬憚

同上

宜擇溫厚

高馮貞觀初上五事曰如尚書八座人之所責成者也
宜擇溫厚修潔者任之尚樸素革浮偽使家識孝慈人

知廉恥自然禮節興矣

本傳

妙選德望

唐玄宗欲用牛仙客為尚書張九齡諫曰不可尚書古

之納言有唐以來多用舊相居之不然歷踐內外清貴之地妙選有德望者充之仙客本河湟一使典耳拔升清流齒班常伯此官邪也

通鑑

舉觴見屬

後魏肅宗舉觴謂羣臣曰袁尚書朕之杜預故以杯屬元凱侍坐者莫不仰羨

北史

上疏薦拜

後漢左雄虞詡上疏薦之曰雄有王臣蹇蹇之節宜擢

任喉舌之官由是拜尚書

佩刀簪筆

尚書佩契刀囊執板加簪筆焉

表子正書

又周捨問劉杳尚

書官著紫荷相傳云挈囊竟何所出答云張安世傳云
囊簪筆事武帝數十年注云囊索也近臣簪筆以待顧

問

南史

班詔賜珠

顯宗拜鍾離意為尚書時交趾太守張恢坐贓千金徵

還伏法以資物簿入大司農詔班賜羣臣意得珠璣悉以委地而不拜賜帝怪問其故對曰孔子忍渴於盜泉之水曾子回車於勝母之門惡其名也此賊穢之寶誠不敢拜帝嗟歎曰清乎尚書之言乃更以庫錢三十萬賜意轉為尚書僕射

後本傳

鄭崇履聲

前漢鄭崇字子游為尚書僕射數諫諍上納用之每見曳革履上笑曰我識鄭尚書履聲

本傳

杜預武庫

杜預為尚書損益萬機不可勝數朝野稱美號曰杜武

庫言其無所不有

本傳

叱梁冀帶劍

後漢張陵字彪仲為尚書省歲朝梁冀帶劍入省陵叱冀令出敕虎賁奪其劍百僚肅然冀弟不疑曾舉陵孝廉謂曰昔之舉君所以自罰也陵曰今申公憲以報私

恩

本傳

呵虎賁置弓

朱穆拜尚書正月百官朝賀畢虎賁當陞下置弓於地
曰此天子弓誰敢干越穆乃呵之曰天子弓當載之盾
首之上乃敢置地大不敬即收虎賁付詔獄治罪莫不
肅然

古今文集

雜著

上李實尚書

韓愈

愈來京師於今十五年所見公卿大臣不可勝數皆能
守官奉職無過失而已未見有赤心事上憂國如家如
閣下者今年已來不雨者百有餘日種不入土野無青
草而盜賊不敢起穀價不敢貴百坊百二十司六軍二
十四縣之人皆若閣下親臨其家老姦宿職銷縮摧沮
魂亡魄喪影滅跡絕非閣下條理鎮服布宣天子威德
其何能及此

謝襄陽李夷簡尚書撫問啓
柳宗元

某啟當州員外司馬李幼清傳示尚書委曲特賜記憶
過蒙存問捧讀喜懼浪然流涕慶幸之深出自望外伏
惟尚書鶚立朝端風行天下入統邦憲出司主憂控此
上游式是南服凡海內奔走之士思欲修容於轅門之
外躡履於油幢之前譬之涉蓬瀛登崑閬不可得而進
也某負罪淪伏聲銷跡滅固世俗之所棄親友之所遺
敢希大賢曲見存念是以展轉歔歔晝詠宵興願為廝
役以報恩遇瞻仰霄漢邈焉無由網羅未解縱羽翼而

何施囊橐方堅雖虎豹其焉往不任踊躍懇戀之至謹
奉啟起居輕黷威嚴倍增戰越

上河陽烏尚書欲獻文啟

柳宗元

伏以尚書以碩德偉才代著勲烈兩河定亂三城建功
鼎彝竹帛未足云紀進臨汝上控制東方隱然長城朝
野倚賴宗元雖屏棄遐壤而飽聞德聲所恨不獲親執
鞭弭以備戎伍夙夜踴躍不遑寧居伏以威稜所加狂
狡已震莫大之績重復增崇小子久以文字進身嘗好

古人事業專當具筆札拂縑緗贊揚大功垂之不朽瞻
望霄漢戀慕交深冒黷威嚴伏增戰越

律詩

多病執熱奉懷李尚書

杜甫

衰年正苦病侵凌首夏何須氣鬱蒸大水淼茫炎海接
奇峰磈兀火雲昇思霑道暘黃梅雨敢望宮恩玉井冰
不是尚書期不顧山陰野雪興誰乘

暮春陪李尚書過鄭監湖亭汎舟得過字

杜甫

海內文章伯湖邊意緒多
玉樽移晚興桂楫帶酣歌
春日繁魚鳥江天足芰荷
鄭莊賓客地袁白遠來過

送李遜尚書赴襄陽八韻

韓退之

帝憂南國切改命付忠良
壤畫星搖動旗分獸簸揚
五營兵轉肅千里地還方
控帶荆門遠飄浮漢水長
賜書寬屬郡戰馬隔鄰疆
縱獵雷霆迅觀基玉石忙
風流峴首客花艷大堤倡
富貴由身致誰教不自強

總侍郎

歷代沿革初秦置侍郎無員分隸三署主執戟侍宮殿
出則充車騎漢因之侍郎秩四百石以其為郎內侍
故曰侍郎侍郎六卿之副凡諸郎掌更宜執戟宿衛
諸殿門以侍衛之故通謂之侍郎武帝時東方朔為
郎後揚雄為侍郎當時謂之官不過侍郎位不過執
戟是也尚書亦有侍郎初入臺稱郎中滿歲稱侍郎
梁尚書郎入臺功高者轉為侍郎隋煬帝二年尚書

六曹各置侍郎一人以貳尚書之職並正第四品今之侍郎其置自此始又改諸司侍郎但曰郎吏部為選部郎禮部為儀曹郎兵部為兵曹郎刑部為憲曹郎工部為起曹郎以異六侍郎之名唐武德六年廢六司侍郎貞觀二年復又降為正四品下惟吏部侍郎為正四品上咸亨元年復為侍郎總章元年吏部兵部各增侍郎一員宋以為階官至元豐官制行始有職掌元祐二年初置權侍郎從四品如未歷給事

中書舍人及待制以上者竝帶權字祿賜比諫議大夫崇寧罷權侍郎建炎四年復置元仍之置六部侍郎

羣書要語位不過侍郎擢纔給事黃門

楊雄解嘲

周歷五曹

之副建明萬事之本中臺政本思舉舊章六卿貳職今

之盛選

冊府元龜序

文昌貳卿位次八座

東坡除陸佃制

六卿之副

百工之牧

唐制

侍郎掌貳令之職朝廷大政參議焉臨軒

冊命為使則持冊書授之四夷來朝則授其表疏而奏

之獻贄幣則受以付有司

唐百官志

侍郎自皇朝以來為衣

冠之華選自非履歷清要望實具美者無以居之

要類侍

郎三十六人四百石一曹有六人主作文書起草

後百官志

詩句客曾與天通出入清禁中

李白

召登金華省我入銀

臺門

同上

登臨憶侍郎

杜三賢惟侍從卓犖傾鄒枚

從近臣有虛位公今此去何時歸

幸得履中氣忝從

天上星

紅旗照海壓南荒徵入臺中作侍郎

並同上

響

切晨趨佩烟濃近侍香

柳

優游侍從臣左右天子顧

六一

集玉殿清霜綴曉班 晚登玉墀侍珠旒並同 與君持

橐侍帷幄同到溫室觀堯蓂東坡紫府侍臣鳴玉佩山谷大

似不蒙稽古力至今猶着侍臣冠同上

古今事實

閑達故事

後漢陽球字方正為尚書侍郎閑達故事章奏處議為

臺閣所崇信本傳

彌綸舊章

謝承父嬰為尚書侍郎伏事丹墀彌綸舊章

謝承後漢書

尚德之舉

侍郎官重尚德之舉顓宜當之

韓愈舉韋顓自代狀

古今文集

雜著

薛左丞謝除門下侍郎表

汪藻

久參帷幄方俟黜幽進貳機衡遽叨圖舊莫寢已成之
命惟深非據之憂席寵過隆撫躬何幸

謝中伏念臣粵從

孤遠遭值聖明少誦師言每信書而違俗晚陪國論更
充位以妨賢蒙淵鑒之誤知保孤衷而平進肆竭股肱
之力何施毫髮之功豈伊白首之衰蹤堪此黃扉之重
任雖緣人乏實玷詔除茲蓋伏遇皇帝陛下剛健粹精
聰明覺聖疏通萬物之理灼見羣臣之心猥憐樸學之
無他擢處周行之至要第崇資顯秩當收有用之材方
治世昌辰尤急可觀之效誓勤鞭策力振綱維與多士
以同寅上承休德殞百身而圖報敢愛餘生

律詩

寄鄭侍郎

王介甫

兩朝人物嘆賢豪凜凜清風晚見褒
江漢但歸滄海濶丘陵難學泰山高
放懷詩酒機先息回首功名世自勞
久願作公樽俎客恨無三畝劓蓬蒿

送張侍郎

韓愈

司徒東鎮馳書謁丞相西來走馬迎
兩府元臣今轉密一方逋寇不難平

寄王侍郎

杜甫

何限倚山木吟詩秋葉黃
蟬聲集古寺鳥影度寒塘
風物悲遊子登臨憶侍郎
老夫貪佛日隨意宿僧房

總郎中

歷代沿革初秦置郎中令其屬官有三署五官中郎將
左中郎右中郎將凡三署署中有郎中每員多至千人
分隸三署主執戟侍宮殿出則充車騎漢因之郎
中之名猶因三署本號置尚書郎四人分掌尚書事

時馮唐為郎中置長光武分尚書為六曹每一人尚書則領六郎凡三十六郎自漢以來尚書諸曹郎中侍郎或不兩置魏自黃初改秘書為中書置通事郎掌詔草而尚書郎有二十三人非復漢時職任晉宋齊惟置郎中梁陳兩置後魏北齊惟置郎中隋以諱忠不置郎中煬帝改曰郎唐改郎為郎中龍朔二年改為大夫咸亨光宅神龍竝隨曹改復宋元豐官制行郎官理郡守以上資任者為郎中郎中員外郎亦

自為兩等頗自履歷而授之後來相承必欲以關升
知州資序為郎中於是拜員外者具改官實歷歲月
申吏部不以若干任但通理細滿入考則陞知州乃
作正郎別命詞給告常有旨初除郎官雖資歷已高
且為員外郎候吏部再申然後陞作郎中元六部各
置郎中

羣書要語舊選尚書郎極清望也

山濟
啟事

鄧遐有才義論

者以為宰士之俊宜用為郎

同上

臺郎皆朝之俊選當足

處事宜辨正凝滯也

裴度奏

今以劣弱之質任督責之官

以無用之才管繁劇之任且臺郎清顯論望宜充者

郭璞

表

草奏郎吏之選必資時秀

元和制詔

宜序天臺之屬

同上濫

跡星署

職類

發揮草臺

久參奏議頗練朝章宜從滿歲

之遷俾轉分曹之次處以彌綸之職當茲俊茂之選

宜正列星之次俾承賜筆之寵省理辨疑時稱簡達

高選髦士以分劇曹

並同上

優遊省闈珥筆華軒

滿岳陸機贈

握蘭建禮總郎官

劉孝儀為江表侯射薦士表

翔于郎署

韓文

叨陪錦帳

坐

漢百官志

往自星郎爰秉天憲

楊國忠制

嘉乃令子為吾望郎

元徽之行常審規父漸制

郎官古之元士天下之務多所關決其於

損益大矣

常袞制

虞詡曰臺郎顯職乃筮仕之通階

職類

臺

郎御史邦之俊茂若出宰牧守頌聲興矣

晉起居注

晉尚書

郎選極清美號為大臣之副

通典

詩句郎官清要為世稱

韓愈永貞行

馨香粉署妍

杜

為是先

帝白髮郎

東坡

舌還應共賜香

君為尚書郎坐擁百

吏繁

東川得望郎坐與西爭重

並同上

喜得廊廟舉嗟

為臺閣分遠從南斗外遙仰列星文

蘇味
道

郎官有錦帳

杜

古今事實

含香握蘭

尚書郎伏奏事黃門郎對揖跪受故稱尚書郎懷香握

蘭趨走丹墀

應劭漢
官儀

又尚書郎口含鷄舌香以其奏事

答對欲使氣息芬芳也

作文起草

尚書郎主作文書起草晝夜更直五日於建禮門外

粉署丹墀

粉署郎署也以諸郎官握蘭含香故云馨香又謂之畫省以粉畫之故言粉署又省中皆以胡粉塗壁畫古賢烈士以丹朱漆地故謂之丹墀

青縑白被

尚書郎入直官給青縑白綾被或以錦被給帷帳茵褥通中枕太官供食物湯官供餅餌及五熟果實之屬五

日一美食下天子一等

夕對青瑣

黃門郎日夕入對青瑣門拜

月賜筆墨

漢尚書郎月賜赤管大筆一雙隃麋墨一丸

獨宿臺上

黃香為尚書郎常獨止宿臺上晝夜不離省闥帝聞而

善之

類要

常伏省下

馮豹為尚書郎每奏事未報常伏省下或自昏至明天子默使人持被覆之

太微積星

後漢楊秉疏太微積星名為郎位入奉宿衛出宰百里

太微後星

太微後二十五星郎位也

一曰依烏

郎位十五星在帝位東北一曰依烏郎府也三省郎中是其職也

號三列宿

韋湊祖叔諧貞觀中為康部郎中與弟吏部郎中叔謙兄主爵郎中季武同省時號三列宿

拜舉孝廉

胡廣舉孝廉為天下第一旬月拜尚書郎恪勤職事所掌兼治兩曹

續漢書

梁魏武集選舉令云國家舊法選尚

書郎以取孝廉也

詔選清白

安帝元初六年詔中郎將選孝廉郎寬博有謀清白行

高者出補令丞尉

後漢記

容儀端正

田鳳字季宗為尚書郎容儀端正入奏事靈帝目送之

因題柱曰堂堂乎張京兆田郎

三輔決錄

威容可視

杜軫為尚書郎威容可視

華陽國志

皆須稱職

永昌五年勅六官分事四方取則尚書郎皆是妙選須

稱司馬焉

唐會要

不可賞能

開成四年鹽鐵推官姚勗鞠問河陰黠吏得實除職方員外郎右丞韋溫上疏以郎官朝廷之清選不可以賞

能吏

續通典

豈郎才邪

李林甫源乾曜執政乾曜子潔為林甫求司門郎中乾曜素薄之曰郎官應得才望哥奴豈郎中才邪哥奴林

甫小字也

同上

至郎足矣

孔若思勵學擢明經歷庫部郎中嘗曰仕宦至郎中足矣座右置水一石明自足意

同上

自起撞郎

明帝性褊察常以事怒郎藥崧以杖撞之崧走入床下
帝甚怒疾言曰郎出郎出崧曰天子穆穆諸侯皇皇未
聞人君自起撞郎帝赦之

鍾離
意傳

皆主更直

五官中郎將一人主五官郎五官郎中無員凡郎官皆

主更直執戟衛諸殿門

後百
官志

襍被選出

魏舒為尚書郎時郎選或有非其人者論者欲沙汰之

舒曰吾即其人也襍被選出同僚素無清論咸有愧色

談者莫不詠其高

晉本傳

給帳入直

尚書郎入直官給帷帳氈褥侍史二人選端正妖麗執

香爐護衣服奏事明光殿

宋百官志

職典樞機

徐防補尚書郎職典樞機周密畏謹奏事三世未嘗有

過云

類要

才堪廊廟

索靖字緄字巨秀少有逸羣之量靖每曰廊廟之才非簡札之用州郡吏不足汙吾兒也舉秀才除郎中

晉書

白首郎署

馮唐以孝廉著為郎中署長白首屈於郎

荀悅漢紀

一家郎官

韋虛心父子兄弟更踐郎署時稱郎官家

舊唐書

披靚青天

樂廣為尚書郎與何晏鄧颺等談講衛瓘見而奇之曰
常恐微言將絕今復聞之命諸子造焉謂曰人之水鑑
也每見此人瑩然如披雲霧而覩青天也

王隱
晉書

上應列宿

後漢館陶公主為子求郎不許明帝謂羣臣曰郎官上
應列宿出宰百里

紀本

馮勤佳吏

馮勤除為郎中每引進帝顧左右曰佳乎吏也

本傳

趙華高名

趙華早擅高名在宦途五十年累經貶謫蹇躓備至入仕三十年方霑省官

古今文集

古詩

天星送楊凝郎中賀正

韓昌黎

天星牢落雞喔咿僕夫起飡車載脂正當窮冬寒未已
借問君子行安之會朝元正無不至受命上宰須及期

侍從近臣有虛位公今此去歸何時

和趙郎中捕蝗韻

蘇子瞻

麥穗人許長穀苗牛可沒天公獨何意忍使蝗蟲發驅攘著令典農事安可忽我僕既胼胝我馬亦款矻飛騰漸云少筋力亦已竭苟無百篇詩何以醒睡兀初如疏畎澮漸若決澮渤往來供十吏脫脫不容歇平生輕妄庸熟視笑魏勃愛君有逸氣詩壇專斬伐民病何時休吏職不可越慎無及世事向空書咄咄

律詩

送陸郎中

錢起

事邊仍戀主，舉酒復悲歌。
粉署含香別，轅門載筆過。
鶯聲出漢苑，柳色過漳河。
相憶情難盡，離居春草多。

送致政朱郎中東歸

王介甫

平生不省問田園，白首忘懷道更尊。
已上印書辭北闕，稍留冠蓋餞東門。
馮唐老有為郎戀，疎廣終無任子恩。
今日榮歸人所羨，兩兒腰綬擁高軒。

喜李侍御拜郎官入省

錢起

粉署花驄入丹霄紫誥垂直廬驚漏近賜被覺霜移漢
主前瑤席穰侯許鳳池應憐後行鴈空羨上林枝

聞崔馬竝拜臺郎

蘇味道

振鷺齊飛日遷鶯遠聽聞明光共待漏清覽各披雲喜
得廊廟舉嗟為臺閣分遠從南斗外遙仰列星文

南省伴直

韋莊

文昌二十四仙曹盡倚紅簷種露桃一洞烟霞人迹少

六行槐柳馬聲高星分夜彩寒侵帳蘭惹春香綠映袍
何事愛留詩客宿宿滿庭風雨竹蕭騷

賀楊十二新拜省郎

白樂天

文昌新入有光輝紫界宮牆白粉闌曉日雞人傳漏箭
春風侍女護朝衣

省中即事

岑參

華省謬為郎蹉跎鬢已蒼到來還襍被隨例且含香

嘲趙郎中

賀遂涉

員外由來美郎中望不優寧知粉署裏翻作土山頭

總員外郎

歷代沿革晉宋尚書省置員外郎分判曹事隋開皇三年尚書二十四司各置員外郎一人謂本員之外復

置郎也掌其曹之版籍侍郎闕則釐其曹事此今員

外郎所由始也

通典注歷代尚書郎各以部名爲稱首或謂之侍郎皆無員外之號前代

文傳及職官要錄或有言員外郎者蓋謂員外郎散騎侍郎耳非尚書之職也

煬帝三年每

司減一郎置承務郎一人同開皇員外之職唐尚書

諸曹各置員外吏部置二人龍朔咸亨光宅竝隨改
復宋元豐官制六曹郎官理郡守以上資任者郎中
通判以下資序者為員外郎雖理知州資序未嘗實
歷知州及監司開封府推判官者止除員外郎元六
部各置員外郎

羣書要語任外郎之員承諸曹之務

胡文恭行
王稹制

陟中臺

之局賓副郎之聯

王鼎
制

俾升文昌用副郎選

公是行雍
明遠制

古今事實

散郎

外郎散郎也

漢惠帝紀注

副郎

韋侯以考功副郎守盛山

韓文盛山十二詩序

彌重其選

員外郎唐朝彌重其選

通典

司皆其選

職員令二十四司皆其選也

古今文集

律詩

和王員外晴雪早朝

鄭谷

紫微晴雪帶恩光
繞仗偏隨鴛鴦行
長信月留寧避曉
宜春花滿不飛香
獨看積素凝清禁
已覺輕寒讓太陽
題柱盛名兼絕唱
風流誰繼漢田郎

送鄭員外

韓翃

風流不減杜陵時
五十為郎未是遲
孺子亦知名下士

樂人爭唱卷中詩身齊吏部還多醉心顧尚書自有期
要路眼看知已在不應窮巷久低眉

同錢員外禁中夜直

白居易

宮漏三聲知夜半好風涼月滿松筠此時間坐寂無語
藥樹影中惟兩人

聽水部吳員外新詩

白居易

朱紱仙郎白雪歌和人雖少愛人多明朝與向詩家道
水部如今不姓何



古今事文類聚新集卷十